



Nyiaj Poob Haujlwm

Unemployment Insurance

Nyiaj poob haujlwm yog muab rau cov neeg uas poob lawv txoj haujlwm thaum tsis yog tim lawv. Daim ntawv qhia no qhia txog ib co cai tias leejtwg yog cov muaj feem tau nyiaj poob haujlwm. Yog koj tsis paub tseeb tias koj puas muaj feem tau nyiaj poob haujlwm, **koj yuav tsum ua ntawv thov**. Txawm muaj lwm cov cai tswj los, kuj muaj 3 txoj cai tuav.

1. Koj yuav tsum tau poob koj txoj haujlwm thiab tsis txhob yog tim koj. Feem ntau, qhov no txhais tau tias koj tsis muaj feem tau nyiaj poob haujlwm yog tias koj yog tus tawm lossis raug rho tawm haujlwm. Tiamsis kuj muaj kev zam tau thiab. Tej thaum koj muaj feem tau txais nyiaj poob haujlwm rau tej yam muaj li nram qab no. Yog koj tsis paub tseeb, koj yuav tsum ua ntawv thov.

- Puas yog muab koj rho tawm haujlwm vim tsis muaj haujlwm ua lawm?
- Puas yog txo koj cov sijhawm ua haujlwm?
- Puas yog koj tawm haujlwm vim koj txoj haujlwm tsis nyab xeeb lossis muaj neeg hawv lossis ua phem rau koj?
- Puas yog koj tawm vim muaj mob lossis xwm txheej ceev hauv koj tsev neeg thiab nrhiav sijhawm tawm tsis tau?
- Puas yog koj tawm lossis rau rho tawm vim tej yam hloov ntawm koj kev noj qab haus huv rau txoj kev xav lossis lub cev uas ua nyuab rau koj ua haujlwm?
- Puas yog koj tus nai hloov cov nyiaj them rau koj, lub sijhawm haujlwm, lossis cov teev haujlwm thiab ua rau nyuab koj kev mus haujlwm?
- Puas yog koj muaj mob lossis raug mob thiab ua rau kev ua haujlwm nyuab heev? Puas yog tej tug hauv koj tsev neeg muaj mob lossis raug mob?
- Puas yog koj plam txoj kev pab zov menyuam lossis kev tsheb siv mus los? Puas yog koj tus nai lossis neeg nrog koj ua haujlwm ua phem rau koj lossis koj phem rau koj?



2. Koj yuav tsum nrhiav haujlwm tom qab poob koj txoj haujlwm. Saib koj txoj kev nrhiav haujlwm yam nkaus li yog ib txoj haujlwm thiab. Siv txog li 30 teev tauj ib lispam los nrhiav haujlwm tshiab. Khaws cia tej ntaub ntawv qhia tias koj mus nrhiav haujlwm qhov twg.

3. **Koj yuav tsum ua tau haujlwm thiab muaj sijhawm ua haujlwm tom qab koj poob koj txoj haujlwm.** Yog koj muaj teebmeem nrog kev noj qab haus huv lossis muaj chaw khuam (xws li kev kawm ntawv) uas ua rau koj nrhiav tsis tau haujlwm lossis mus haujlwm, koj tsis muaj feem tau.

Cim Cia: Yog koj tau txais nyiaj pab rau kev tu ncu, tej zaum koj kuj muaj feem tau txaus nyiaj poob haujlwm mentsis. Tiv tauj koj lub chaw khiav dejnum lijchoj kom paub ntau ntxiv.

Tej zaum koj muaj feem tau nyiaj poob haujlwm yog tias....

- Tej thaum, koj muaj feem tau txais nyiaj poob haujlwm yog tias koj raug **yuam kom tawm** haujlwm. Pivtxwv, yog koj lossis lwm tus hauv koj tsev neeg muaj mob hnyav lossis raug mob loj koj yuavtsum tau qhia rau koj lub chaw haujlwm paub thiab nug kev zam kom haum rau qhov teebmeem. Qhov no txhais tias koj xav kom muab tej yam hloov, kom koj tseem ua tau koj txoj haujlwm twjywm. Yog koj lub chaw haujlwm tsis kam pab dabtsi rau koj txoj kev muaj teebmeem no li thiab ua rau koj yuav tsum tau tawm, tejzaum koj kuj muaj feem tau nyiaj poob haujlwm.
- Tej zaum koj muaj feem tau nyiaj poob haujlwm yog tias koj tseem tau koj txoj haujlwm, tiamsis koj lub **chaw haujlwm hloov koj cov sijhawm** thiab hloov cov nyiaj them rau koj lawm ntau txawm tias koj tsis tau ua dabtsi txhaum.
- Tej zaum koj kuj muaj feem tau txais nyiaj poob haujlwm yog koj xav tias koj yuav tsum tau tawm haujlwm vim koj lub chaw haujlwm tsis txhim kho tej yam teebmeem loj uas **koj twb qhia** rau lawv lawm, xws li lub chaw haujlwm tsis muaj kev nyab xeeb, muaj kev ua kov lossis hais lus dhau cai lossis muaj kev xaiv ntsej xaiv muag tsis ncaj ncees.

Yog muaj tej yam li no tshwm sim, koj yuav tsum muab sau cia txog qhov tshwm sim ntawd **thiab** thaum twg thiab sau koj cov lus tsis haum siab ua ntawv mus qhia. Nco ntsoov muab luam ib daim cia rau koj tus kheej khaws tseg txog txhua yam tseem ceeb.



Nco ntsoov: nws tseem ceeb koj qhia rau koj lub chaw haujlwm paub txog qhov teebmeem thiab muab sijhawm rau lawv kho.

Yog koj tsis ua li no, koj muaj feem yuav raug rho tawm ntawm kev tau nyiaj poob haujlwm.

Tej zaum koj yuav tsis tau nyiaj poob haujlwm yog tias...

- Tejzaum koj yuav **tsis** tau nyiaj poob haujlwm yog tias koj tawm haujlwm vim tej yam teebmeem ntawm koj tus kheej lossis vim koj tsis nyiam koj txoj haujlwm xwb.
- Tej zaum koj **tsis** tau nyiaj poob haujlwm yog koj tus nai tias koj raug rho tawm vim ua tsis raws cai. Kev ua tsis raws cai muaj feem yog tej yam xws li tsis tuaj haujlwm txaus thiab pheej tuaj lig ntau dhau. Nws kuj muaj tej yam xws li nyiaj khoom, dag, sib ntaus thaum ua haujlwm lossis tsis kam ua li tus nai haujlwm tau hais. Yog hais rau koj kom

txhob ua tej yam lossis yog koj pheed ua txhaum cov cai tom qab twb qhia tag lawm, koj tus nai muaj feem hais tias qhov ntawd yog kev ua tsis raws cai.

Yog muaj tej yam es koj thiaj tau ua txhaum cov cai lossis tsis ua li koj tus nai tau hais, tej zaum koj muaj feem txais tau. Tej yam muaj yog hais txog kev nyab xeeb thiab kev noj qab nyob zoo ntawm cov neeg ua haujlwm. Yog koj xav tias koj yeej ua qhov yog lawm, koj yuav tau ua ntawv thov nyiaj poob haujlwm.

Kuv ua haujlwm thaum kuv tseem tau nyiaj poob haujlwm puas tau?

Koj ua tau haujlwm ib nrab hnub thaum tau nyiaj poob haujlwm, tiamsis cov nyiaj koj khwv tau los yuav muab rho tawm ntawm cov nyiaj poob haujlwm. Nws muaj raws li no:

- Yog koj ua haujlwm **tsawg dua 32 teev** LOSSIS yog cov teev ntawm koj txoj haujlwm raug txo qis tshaj 32 teev thiab koj khwv tau tsawg dua koj cov nyiaj poob haujlwm tauj ib lispiam, koj txais tau ib feem ntawm cov nyiaj.
- Yog koj ua haujlwm **32 teev lossis ntau dua** tauj ib lispiam lossis yog tias koj cov nyiaj tagnrho khwv tau los tauj ib lispiam yog ib yam lossis ntau dua koj cov nyiaj poob haujlwm, koj yuav tsis tau txais nyiaj poob haujlwm rau lub lispiam ntawd.

Nws tseem ceeb heev rau koj qhia txog tagnrho koj cov nyiaj uas khwv tau los thiab lwm cov nyiaj mus rau lub chaw khiav ntaub ntawv poob haujlwm Unemployment Office. Qhia cov nyiaj uas koj khwv tau los ntawm tagnrho koj cov haujlwm, tsis hais cov haujlwm ua ib ntus lossis cov ua ib nrab hnub. Qhia cov nyiaj khwv tau los txawm koj xav tias lub chaw Unemployment Office twb paub txog lawm los tsis paub txog txoj haujlwm ntawd.

Yog koj tsis qhia txog tagnrho koj cov nyiaj khwv tau los lossis lwm cov nyiaj, koj yuav tau txais nyiaj ntau tshaj qhov koj yuav tsum tau. Koj yuav tau them rov qab qhov nyiaj koj tau tshaj no mus rau lub chaw Unemployment Office, nrog rau cov nyiaj paj. Tej zaum koj yuav tau them nyiaj raug nplua vim ua txhaum thiab.



Txhua qhov kuj nyias txawv nyias. Hu mus rau koj lub chaw khiav ntaub ntawv lij choj tamsim tham tau txog koj rooj ntawv.

Mus nrhiav koj lub chaw khiav dejnum nov:

<https://www.lawhelpmn.org/hm/providers-and-clinics>.

Kuv muaj feem tau nyiaj npaum licas?

Nyiaj poob haujlwm yog thaj tsam li 50 feem pua ntawm cov nyiaj uas koj khwv tau los. Tiamsis tej zaum kuj yuav tsawg dua nyob rau tej lub sijhawm thiab.

Ua Ntaub Ntawv Thov Nyiaj

Ua koj cov ntaub ntawv thov nyiaj sai li sai tau. Koj yim tos ntev, yim siv sijhawm ntev rau koj tau cov nyiaj xwb. Koj yuav tsis tau nyiaj rau lub sijhawm tom qab koj hnuv xaus kev ua haujlwm thiab lub lispiam koj mus ua ntaub ntawv. Ntxiv ntawd, muaj 1 lub lispiam uas yuav tau tos ua ntej koj tau cov nyiaj thawj zaug.

Nws ceev tshaj rau koj ua ntaub ntawv hauv lub vassab ntawm <http://www.uimn.org/>. Koj kuj ua ntaub ntawv los ntawm kev hu xovtooj. Yog nyob hauv nroog, hu rau (651) 296-3644. Nyob nroog sab nraum nroog, hu rau 1-(877) 898-9090. TTY: 1-(866) 814-1252

Muab tagnrho koj tej ntaub ntawv haujlwm los uake:

- Tus zauv social security
- Lub npe ntawm lub chaw haujlwm thiab chaw nyob
- Cov hnuv tim uas koj ua haujlwm ntawd
- Vim licas txoj haujlwm xaus
- Cov npe ntawm koj cov chaw haujlwm tau 18 lub hlis dhau los thiab cov hnuv tim uas koj tau ua haujlwm rau txhua lub chaw ntawd
- Tej ntaub ntawv uas muaj los ntawm koj cov chaw haujlwm qhia txog tias vim licas koj txoj haujlwm tau xaus

Kuv txais tau nyiaj poob haujlwm ntev npaum licas?

Feem ntau, koj tau txais mus txog 26 lub lispiam ntawm cov nyiaj poob haujlwm, tiamsis koj yuav tsum tau siv ua ntej xaus lub xyoo uas koj ua ntawv thov.

Txhua lub lispiam koj yuav tsum tau mus nkag rau koj lub askhaj lossis hu thiab nug txog cov nyiaj.

Koj koj rov los hais dua yog tias lawv tsis kam muab nyiaj poob haujlwm rau koj, txo koj cov nyiaj lossis muab txiav tu lawm.

Koj yuav txais ib tsab ntawv yog tias koj cov nyiaj raug hloov. Koj xa koj cov ntaub ntawv tsis txaus siab rau hauv hlwb hlau, xa ua tsab ntawv lossis luam rau xovtooj mus. Cov ntaub ntawv qhia kev ua li no muaj nrog daim ntawv.



Koj muaj 20 hnuv tsis txaus siab rov hais dua. Tsis txhob tos txog hnuv kawg mam li ua ntawv tsis txaus siab. Yog koj tos dhau lub sijhawm lawm ces koj cov ntaub ntawv tsis txaus siab yuav tsis raug saib. Nco ntsoov luam ib co cia rau koj khaws txog cov ntaub ntawv tsis txaus siab. Lawv yuav teem lub caij mloog rooj plaub ntawd rau lub xovtooj thiab xa ntawv tuaj qhia txog qhov no rau koj. Saib kom zoo tias koj muab tus xovtooj tseeb rau lawv rau rooj plaub no. Nco ntsoov txais xovtooj rau lub sijhawm teem caij hu tham txog rooj plaub no! Yog koj tsis teb tsab xovtooj, koj yuav poob koj feemxyuam ntxeev txoj kev txiav txim uas koj tsis txaus siab no.

Yog Koj Muaj Ib Roj Plaub

- **Muab koj tej ntaub ntawv povthawj los uake** –Nyeem cov ntaub ntawv uas xa tuaj ntawm lub Unemployment Office txog tias vim li cas koj lub chaw haujlwm xav tias koj yuav tsum tsis txhob tau nyiaj poob haujlwm, lossis vim li cas koj cov nyiaj poob haujlwm raug txo lossis txiav tu lawm. Luam ntawv xa xovtooj mus qhia txog tej ntaub ntawv, kws kho mob cov lus lossis tej ntawv uas muab mus rau tus kws txiav txim. Sau cia tej yam uas koj xav hais nyob rau roj plaub, kom koj thiaj li tsis hnov qab ib yam dabtsi.
- **Kev pab lijchoj** –Koj tsis tas yuav **tsum muaj** ib tug kws lijchoj, tiamsis yog muaj ces yuav pab tau koj. Xuaj kawg yuav tsum tham nrog ib tug kom muab tau tswv yim txog tias yog koj ua koj xwb no yuav zoo li cas rau roj plaub. Hu mus rau koj lub chaw khiav dejnum txog kev lijchoj kom pab tau lossis qhia tau cov kev pab rau koj.

Yog koj swb roj plaub tsis txaus siab rov hais dua ntawd, tej zaum koj tau txais nyiaj tshaj lawm. Qhov no txhais tau tias tej zaum koj yuav tau them cov nyiaj poob haujlwm uas koj tau txais rov qab.

Yog xav paub ntxiv txog kev tsis txaus siab rov hais dua ces mus rau lub vassab ntawm <http://www.uimn.org/> lossis hu rau (651) 296-3795.



Cov ntawv Qhia Tseeb yog qhia kom paub txoj kevcai xwb TSIS yog muab txwv yim txog txoj kevcai. Mus ntsib ib tug kws lij choj rau tswv yim. Tsis txhob siv daim ntawv qhia tseeb yog tias nws qub tshaj ib xyoos lawm. Nug peb txog cov hloov tshiab, daim ntawv qhia txog cov ntawv qhia tseeb, lossis lwm hom ntawv.

© 2021 Minnesota Legal Services Coalition. Luam tau daim ntawv no los siv rau tus kheej tsis ua lag luam thiab qhia kom paub xwb. Tagnrho lwm cov cai ceev tseg. Qhov lus sau no yuav tsum nyob rau txhua daim ntawv. Txwv tsis pub muab luam, faib, thiab siv ua lag luam.